

四庫全書

史部

欽定四庫全書

史部
釋史卷八十七
上
下

詳校官檢討臣羅國俊

編修臣裴謙覆勘

覆校官博士臣劉光第

校對官中書臣孫希旦

謄錄監生臣桑英

欽定四庫全書

釋史卷八十七上

靈壁縣知縣馬驥撰

晉卿廢興

史記魏之先畢公高之後也畢公高與周同姓武王之
伐紂而高封於畢於是為畢姓其後絕封為庶人或在
中國或在夷狄其苗裔曰畢萬事晉獻公獻公之十六
年趙夙為御畢萬為右以伐霍耿魏滅之以耿封趙夙
以魏封畢萬為大夫趙氏之先與秦共祖奄父生叔

帶叔帶之時周幽王無道去周如晉事晉文侯始建趙氏於晉國自叔帶以下趙宗益興五世而生趙夙趙夙晉獻公之十六年伐霍魏耿而趙夙為將伐霍霍公求犇齊晉大旱卜之曰霍太山為祟使趙夙召霍君於齊復之以奉霍太山之祀晉復穰晉獻公賜趙夙耿

詩糾糾葛屨可以履霜摻摻女手可以縫裳要之襪之好人服之好人提提宛然左辟佩其象揄維是褊心是以為刺 彼汾沮洳言采其莫彼其之子美無度美無

度殊異乎公路彼汾一方言采其桑彼其之子美如英
美如英殊異乎公行彼汾一曲言采其蕢彼其之子美
如玉美如玉殊異乎公族 園有桃其實之殽心之憂
矣我歌且謠不知我者謂我士也驕彼人是哉子曰何
其心之憂矣其誰知之其誰知之蓋亦勿思園有棘其
實之食心之憂矣聊以行國不知我者謂我士也罔極
彼人是哉子曰何其心之憂矣其誰知之其誰知之蓋
亦勿思 陟彼岵兮瞻望父兮父曰嗟予子行役夙夜

無已上慎旃哉猶來無止陟彼岵兮瞻望母兮母曰嗟
子季行役夙夜無寐上慎旃哉猶來無棄陟彼岡兮瞻
望兄兮兄曰嗟子弟行役夙夜必偕上慎旃哉猶來無
死十畝之閒兮桑者閑閑兮行與子還兮十畝之外
兮桑者泄泄兮行與子逝兮坎坎伐檀兮寘之河之
干兮河水清且漣漪不稼不穡胡取禾三百廛兮不狩
不獵胡瞻爾庭有縣貆兮彼君子兮不素餐兮坎坎伐
輻兮寘之河之側兮河水清且直漪不稼不穡胡取禾

三百億兮不狩不獵胡瞻爾庭有縣特兮彼君子兮不
素食兮坎坎伐輪兮寘之河之湄兮河水清且淪猗不
稼不穡胡取禾三百困兮不狩不獵胡瞻爾庭有縣鵲
兮彼君子兮不素食兮 碩鼠碩鼠無食我黍三歲貫
女莫我肯顧逝將去女適彼樂土樂土樂土爰得我所
碩鼠碩鼠無食我麥三歲貫女莫我肯德逝將去女適
彼樂國樂國樂國爰得我直碩鼠碩鼠無食我苗三歲
貫女莫我肯勞逝將去女適彼樂郊樂郊樂郊誰之永

號

詩序葛屨刺褊也魏地陘隘其民機巧趨利其君儉

嗇褊急而無德以將之汾沮洳刺儉也其君儉以

能勤刺不得禮也園有桃刺時也大夫憂其君國小

而迫而儉以嗇不能用其民而無德教日以侵削故作

是詩也陟岵孝子行役思念父母也國迫而數侵削

役乎大國父母兄弟離散而作是詩也十畝之閒刺

時也言其國削小民無所居焉伐檀刺貪也在位貪

鄙無功而受祿君子不得進仕爾碩鼠刺重斂也國

人刺其君重斂蠶食於民不得進仕爾碩鼠刺重斂也國

也○魏滅于晉故附其詩於此鄭譜曰其詩在乎桓之

世輔氏曰變風作於平桓之世而國遂

滅於惠王之十七年止五六十一年閒耳

左傳

閔公元年

賜趙夙耿賜畢萬魏以為大夫卜偃曰畢萬

之後必大萬盈數也魏大名也以是始賞天啓之矣天

子曰兆民諸侯曰萬民今名之大以從盈數其必有衆
初畢萬筮仕於晉遇屯䷂之比䷇辛廖占之曰吉
屯固比入吉孰大焉其必蕃昌震為土車從馬足居之
兄長之母覆之衆歸之六體不易合而能固安而能殺
公侯之卦也公侯之子孫必復其始

史記畢萬封十一年晉獻公卒四子爭更立晉亂而畢
萬之世彌大從其國名為魏氏生武子魏武子以魏諸
子事晉公子重耳晉獻公之二十一年武子從重耳出

亡十九年反重耳立為晉文公而令魏武子襲魏氏之
後封列為大夫治於魏生悼子魏悼子徙治霍生魏絳
徙治安邑魏絳卒諡為昭子生魏羸羸生魏獻子魏獻

子生魏侈魏侈之孫曰魏桓子桓子之孫曰文侯都

世本

畢萬生芒季芒季生武仲州武仲生莊子絳莊子生獻
子荼獻子生簡子取取生襄子多襄子生桓子駒桓子
生文侯斯○世
次與史記不同 夙生共孟共孟生趙衰字子餘趙衰

卜事晉獻公及諸公子莫吉卜事公子重耳吉即事重
耳重耳以驪姬之亂亡奔翟趙衰從文公所以反國及

霸多趙衰計策晉襄公之六年而趙衰卒諡為成李趙盾代成季任國政晉景公時而趙盾卒諡為宣孟子朔嗣趙武續趙宗平公十二年而趙武為正卿趙武死

諡為文子文子生景叔趙景叔卒生趙鞅是為簡子

世本

公明生共孟及趙夙夙生成季衰衰生宣孟盾○國語云趙衰趙夙弟也諸說互異

韓之先與

周同姓姓姬氏其後苗裔事晉得封於韓原曰韓武子武子後三世有韓厥從封姓為韓氏號為獻子獻子卒子宣子代宣子徙居州宣子卒子貞子代立貞子徙居

平陽貞子卒子簡子代簡子卒子莊子代莊子卒子康

子代康子卒子武子代武子卒子景侯立

世本韓萬生
昧伯昧伯生

定伯簡簡生興興生獻子厥厥生宣子起起生平子項
○據國語自桓叔以下嘉吾子之賜或說韓氏是曲沃

桓叔之後已上

三卿世系考

左傳

僖公二十四年

狄人歸季隗于晉而請其二子文公妻趙

衰生原同屏括樓嬰趙姬請逆盾與其母子餘辭姬曰

得寵而忘舊何以使人必逆之固請許之來以盾為才

固請于公以為嫡子而使其三子下之以叔隗為內子

而已下之

二十五年

晉侯問原守於寺人勃鞞對曰昔趙

衰以壺飧從徑餒而弗食故使處原

韓非子晉文公出亡箕鄭挈壺餐而

從迷而失道與公相失饑而道泣寢餓而不敢食及文公反國舉兵攻原而拔之文公曰夫輕忍饑餒之患而必全壺餐是將不以原叛乃舉以為原令大夫渾軒聞而非之曰以不動壺餐之故怙其不以原叛也不亦無術乎故明主者不恃其不我叛也恃吾不可叛也不恃其不我欺也恃吾不可欺也

二十八年晉侯

作三行以禦狄荀林父將中行屠擊將右行先蔑將左

行

三十一年

秋晉蒐于清原作五軍以禦狄趙衰為卿

國語晉國饑公問於箕鄭曰救饑何以對曰信公曰安

信對曰信於君心信於名信於令信於事公曰然則若何對曰信於君心則美惡不踰信於名則上下不干信於令則時無廢功信於事則民從事有業於是乎民知君心貧而不懼藏出如入何匱之有公使為箕及清原之蒐使佐新上軍

韓非子文公問箕鄭曰救餓奈何對曰信公曰安信曰信名信名則羣臣

守職善惡不踰百事不急信事則不失天時百姓不踰信義則近親勸勉而遠者歸之矣

公使原

季為卿辭曰夫三德者偃之出也以德紀民其章大矣不可廢也使狐偃為卿辭曰毛之知賢於臣其齒又長

毛也不在位不敢聞命乃使狐毛將上軍狐偃佐之狐
毛卒使趙衰代之辭曰城濮之役先且居之佐軍也善
軍伐有賞善君有賞能其官有賞且居有三賞不可廢
也且臣之倫箕鄭胥嬰先都在乃使先且居將上軍公
曰趙衰三讓其所讓皆社稷之衛也廢讓是廢德也以
趙衰之故蒐於清原作五軍使趙衰將新上軍箕鄭佐
之胥嬰將新下軍先都佐之子犯率蒲城伯請佐公曰
趙衰三讓不失義讓推賢也義廣德也德廣賢至有何

患矣請令衰也從子乃使趙衰佐新上軍

左傳

文公五年

晉陽處父聘于衛反過甯甯嬴從之及溫而

還其妻問之嬴曰以剛商書曰沈漸剛克高明柔克夫子壹之其不沒乎天為剛德猶不干時況在人乎且華而不實怨之所聚也犯而聚怨不可以定身余懼不獲其利而離其難是以去之

國語陽處父如衛反過甯舍於逆旅甯嬴氏嬴謂其妻曰吾求君子久矣乃今得之舉而從之陽子道與之語

及山而還其妻曰子得所求而不從之何其懷也曰吾見其貌而欲之聞其言而惡之夫貌情之華也言貌之機也身為情成於中言身之文也言文而發之合而後行離則有釁今陽子之貌濟其言匱非其實也若中不濟而外彊之其卒將復中外易矣若外內類而言反之瀆其信也夫言以昭信奉之如機歷時而發之胡可瀆也今陽子之情謹矣以濟益也且剛而主能不本而犯怨之所聚也吾懼未獲其利而及其難是故去之期年

乃有賈季之難陽子死之

左傳晉趙成子欒貞子霍伯曰季皆卒 六年春晉蒐

于夷舍二軍使狐射姑將中軍趙盾佐之陽處父至自

溫改蒐于董易中軍陽子成季之屬也故黨于趙氏且

謂趙盾能曰使能國之利也是以上之宣子於是乎始

為國政制事典正法罪辟獄刑董逋逃由質要治舊滂

本秩禮續常職出滯淹既成以授大傅陽子與大師賈

佗使行諸晉國以為常法 賈季怨陽子之易其班也

而知其無援於晉也九月賈季使續鞠居殺陽處父書
曰晉殺其大夫侵官也十一月丙寅晉殺續簡伯賈季
奔狄宣子使史駢送其帑夷之蒐賈季戮史駢史駢之
人欲盡殺賈氏以報焉史駢曰不可吾聞前志有之曰
敵惠敵怨不在後嗣忠之道也夫子禮於賈季我以其
寵報私怨無乃不可乎介人之寵非勇也損怨益仇非
知也以私害公非忠也釋此三者何以事夫子盡具其
帑與其器用財賄親帥扞之送致諸竟

穀梁傳稱國以殺罪累上也襄公已葬其以累上之辭言之何也君漏言也上泄則下闇下闇則上聾且闇且聾無以相通夜姑殺者也夜姑之殺奈何曰晉將與狄戰使狐夜姑為將軍趙盾佐之陽處父曰不可古者君之使臣也使仁者佐賢者不使賢者佐仁者今趙盾賢夜姑仁其不可乎襄公曰諾謂夜姑曰吾始以盾佐女今女佐盾矣夜姑曰敬諾襄公死處父主竟上事夜姑使人殺之君漏言也故士造辟而言詭辭而出曰用我

則可不用我則無亂其德

公羊傳晉殺其大夫陽處父則狐射姑曷為出奔射姑殺

也射姑殺則其稱國以殺何君漏言也其漏言奈何君將使射姑將陽處父諫曰射姑民衆不說不可使將於是廢將陽處父出射姑入君謂射姑曰陽處父言曰射姑民衆不說不可使將射姑怒出刺陽處父于朝而走

左傳

七年

狄侵我西鄙公使告于晉趙宣子使因賈季問

鄆舒且讓之鄆舒問於賈季曰趙衰趙盾孰賢對曰趙

衰冬日之日也趙盾夏日之日也

八年

夷之蒐晉侯將

登箕鄭父先都而使士穀梁益耳將中軍先克曰狐趙之勲不可廢也從之先克奪蒯得田於董陰故箕鄭父

先都士穀梁益耳蒯得作亂 九年春王正月己酉使

賊殺先克乙丑晉人殺先都梁益耳三月甲戌晉人殺

箕鄭父士穀蒯得

殺梁傳稱人以殺誅有罪也鄭父累也

宣公二年初麗姬

之亂詛無畜羣公子自是晉無公族及成公即位乃宦卿之適子而為之田以為公族又宦其餘子亦為餘子其庶子為公行晉於是有公族餘子公行趙盾請以括為公族曰君姬氏之愛子也微君姬氏則臣狄人也公許之冬趙盾為旄車之族使屏季以其故族為公族大

夫史記成公元年十五晉侯使趙同獻狄俘于周不

賜趙氏為公族

年

敬劉康公曰不及十年原叔必有大咎天奪之魄矣

成公三年十二月甲戌晉作六軍韓厥趙括鞅朔韓穿荀驪

趙旃皆為卿賞鞅之功也

四年晉趙嬰通于趙莊姬

五年春原屏放諸齊嬰曰我在故藥氏不作我亡吾二
昆其憂哉且人各有能有不能舍我何害弗聽嬰夢天
使謂已祭余余福女使問諸士貞伯貞伯曰不識也既
而告其人曰神福仁而禍淫淫而無罰福也祭其得亡

乎祭之之明日而亡

年八

晉趙莊姬為趙嬰之亡故譖

之於晉侯曰原屏將為亂欒郤為徵六月晉討趙同趙
括武從姬氏畜于公宮以其田與祁奚韓厥言於晉侯
曰成季之勲宣孟之忠而無後為善者其懼矣三代之
令王皆數百年保天之祿夫豈無辟王賴前哲以免也
周書曰不敢侮鰥寡所以明德也乃立武而反其田焉
年十晉侯夢大厲被髮及地搏膺而踊曰殺余孫不義
余得請於帝矣壞大門及寢門而入公懼入於室又壞

戶公覺召桑田巫巫言如夢公曰何如曰不食新矣公
疾病求醫于秦秦伯使醫緩為之未至公夢疾為二豎
子曰彼良醫也懼傷我焉逃之其一曰居肅之上膏之
下若我何醫至曰疾不可為也在肅之上膏之下攻之
不可達之不及藥不至焉不可為也公曰良醫也厚為
之禮而歸之六月丙午晉侯欲麥使甸人獻麥饋人為
之召桑田巫示而殺之將食張如廁陷而卒小臣有晨
夢負公以登天及日中負晉侯出諸廁遂以為殉

史記朔娶晉成公姊為夫人晉景公之三年大夫屠岸賈欲誅趙氏初趙盾在時夢見叔帶持要而哭甚悲已而笑拊手且歌盾卜之兆絕而後好趙史援占之曰此夢甚惡非君之身乃君之子然亦君之咎至孫趙將世益衰屠岸賈者始有寵於靈公及至於景公而賈為司寇將作難乃治靈公之賊以致趙盾徧告諸將曰盾雖不知猶為賊首以臣弑君子孫在朝何以懲臯請誅之韓厥曰靈公遇賊趙盾在外吾先君以為無罪故不誅

今諸君將誅其後是非先君之意而今妄誅妄誅謂之
亂臣有大事而君不聞是無君也屠岸賈不聽韓厥告
趙朔趣亡朔不肯曰子必不絕趙祀朔死不恨韓厥許
諾稱疾不出賈不請而擅與諸將攻趙氏於下宮殺趙
朔趙同趙括趙嬰齊皆滅其族趙朔妻成公姊有遺腹
走公宮匿趙朔客曰公孫杵臼杵臼謂朔友人程嬰曰
胡不死程嬰曰朔之婦有遺腹若幸而男吾奉之即女
也吾徐死耳居無何而朔婦免身生男屠岸賈聞之索

於宮中夫人置兒絝中祝曰趙宗滅乎若號即不滅若無聲及索兒竟無聲已脫程嬰謂公孫杵臼曰今一索不得後必且復索之奈何公孫杵臼曰立孤與死孰難程嬰曰死易立孤難耳公孫杵臼曰趙世先君遇子厚子彊為其難者吾為其易者請先死乃二人謀取他人嬰兒負之衣以文葆匿山中程嬰出謬謂諸將軍曰嬰不肖不能立趙孤誰能與我千金吾告趙氏孤處諸將皆喜許之發師隨程嬰攻公孫杵臼杵臼謬曰小人哉

程嬰昔下宮之難不能死與我謀匿趙氏孤兒今又賣
我縱不能立而忍賣之乎抱兒呼曰天乎天乎趙氏孤
兒何罪請活之獨殺杵臼可也諸將不許遂殺杵臼與
孤兒諸將以為趙氏孤兒良已死皆喜然趙氏真孤乃
反在程嬰率與俱匿山中居十五年晉景公疾卜之大
業之後不遂者為祟景公問韓厥厥知趙孤在乃曰大
業之後在晉絕祀者其趙氏乎夫自中衍者皆嬴姓也
中衍人面鳥喙降佐殷帝大戊乃周天子皆有明德下

及幽厲無道而叔帶去周適晉事先君文侯至于成公
世有立功未嘗絕祀今吾君獨滅趙宗國人哀之故見
龜策唯君圖之景公問趙尚有後子孫乎韓厥具以實
告於是景公乃與韓厥謀立趙孤兒召而匿之宮中諸
將入問疾景公因韓厥之衆以脅諸將而見趙孤趙孤
名曰武諸將不得已乃曰昔下宮之難屠岸賈為之矯
以君命并命羣臣非然誰敢作難微君之疾羣臣固且
請立趙後今君有命羣臣之願也於是召趙武程嬰徧

拜諸將遂反與程嬰趙武攻屠岸賈滅其族復與趙武
田邑如故及趙武冠為成人程嬰乃辭諸大夫謂趙武
曰昔下宮之難皆能死我非不能死我思立趙氏之後
今趙武既立為成人復故位我將下報趙宣孟與公孫
杵臼趙武啼泣頓首固請曰武願苦筋骨以報子至死
而子忍去我死乎程嬰曰不可彼以我為能成事故先
我死今我不報是以我事為不成遂自殺趙武服齊衰
三年為之祭邑春秋祠之世世勿絕

○按左傳趙氏之難起自莊姬無屠

岸賈其人者事在魯成公八年即晉景公之十七年於是年已有趙武無遺腹匿孤之說也史遷好奇每存異說而事與年推尋皆無據

國語趙文子冠見欒武子武子曰美哉昔吾逮事莊主華則榮矣實之不知請務實乎見中行宣子宣子曰美哉惜也吾老矣見范文子文子曰而今可以戒矣夫賢者寵至而益戒不足者為寵驕故興王賞諫臣逸王罰之吾聞古之王者政德既成又聽於民於是乎使工誦諫於朝在列者獻詩使勿兇風聽臚言於市辯妖祥於

謠考百事於朝問謗譽於路有邪而正之盡戒之術也
先王疾是驕也見卻駒伯駒伯曰美哉然而壯不若老
者多矣見韓獻子獻子曰戒之此謂成人成人在始與
善始與善善進善不善蔑由至矣始與不善不善進不
善善亦蔑由至矣如草木之產也各以其物人之有冠
猶宮室之有牆屋也糞除而已何又加焉見知武子武
子曰吾子勉之成宣之後而老為大夫非恥乎成子之
文宣子之忠其可忘乎夫成子道前志以佐先君道法

而卒以政可不謂文乎夫宣子盡諫於襄靈以諫取惡
不憚死進也可不謂忠乎吾子勉之有宣子之忠而納
之以成子之文事君必濟見苦成叔子叔子曰抑年少
而執官者衆吾安容子見溫季子季子曰誰之不如可
以求乎見張老而語之張老曰善矣從藥伯之言可以
滋范叔之教可以大韓子之戒可以成物備矣志在子
若夫三郤亡人之言也何稱述焉知子之道善矣是先

主覆露子也

已上趙
氏之難

左傳

僖公三十三年

初曰季使過冀見冀缺耨其妻饁之敬相

待如賓與之歸言諸文公曰敬德之聚也能敬必有德
德以治民君請用之臣聞之出門如賓承事如祭仁之
則也公曰其父有罪可乎對曰舜之罪也殛鯀其舉也
興禹管敬仲桓之賊也實相以濟康誥曰父不慈子不
祇兄不友弟不共不相及也詩曰采葑采菲無以下體
君取節焉可也文公以為下軍大夫反自箕襄公以三
命命先且居將中軍以再命命先茅之縣賞胥臣曰舉

卻缺子之功也以一命命卻缺為卿復與之冀亦未有

軍行

國語曰季使舍於冀野冀缺稱其妻饁之敬相待如賓從而問之冀芮之子也與之歸既復命而進

之曰臣得賢人當以告文公曰其父有臯可乎對曰國之良也滅其前惡是故舜之刑也殛鯀其舉也興禹今君之所聞也齊桓親舉管敬子其賊也公曰子何以知其賢也對曰臣見其不忘敬也夫敬德之恪也恪於德以臨事其何不濟公宣公八年

秋廢胥克使趙朔佐下軍

成公十一年

聲伯之母不聘穆

姜曰吾不以妾為姒生聲伯而出之嫁於齊管于奚生二子而寡以歸聲伯聲伯以其外弟為大夫而嫁其外

妹於施孝叔卻犢來聘求婦於聲伯聲伯奪施氏婦以與之婦人曰鳥獸猶不失儷子將若何曰吾不能死亡婦人遂行生二子於卻氏卻氏亡晉人歸之施氏施氏逆諸河沈其二子婦人怒曰已不能庇其伉儷而亡之又不能字人之孤而殺之將何以終遂誓施氏 晉卻至與周爭鄆田王命劉康公單襄公訟諸晉卻至曰溫吾故也故不敢失劉子單子曰昔周克商使諸侯撫封蘇忿生以溫為司寇與檀伯達封于河蘇氏即狄又不

能於狄而奔衛襄王勞文公而賜之溫狐氏陽氏先處之而後及子若治其故則王官之邑也子安得之晉侯使卻至勿敢爭 十三年春晉侯使卻錡來乞師將事

不敬孟獻子曰卻氏其亡乎禮身之幹也敬身之基也卻子無基且先君之嗣卿也受命以求師將社稷是衛

而惰棄君命也不亡何為

殺梁傳乞重辭也古之人重師故以乞言之也

十四

年衛侯饗苦成叔甯惠子相苦成叔傲甯子曰苦成家其亡乎古之為饗食也以觀威儀省禍福也故詩曰兕

饋其鰥旨酒思柔彼交匪傲萬福來求今夫子傲取禍

之道也

年十五

晉三郤害伯宗譖而殺之及藥弗忌伯

州犁奔楚韓獻子曰郤氏其不免乎善人天地之紀也
而驟絕之不亡何待初伯宗每朝其妻必戒之曰盜憎
主人民惡其上子好直言必及于難

國語伯宗朝以喜歸其妻曰子貌有喜何也曰吾言於
朝諸大夫皆謂我知似陽子對曰陽子華而不實主言
而無謀是以難及其身子何喜焉伯宗曰吾飲諸大夫

酒而與之語爾試聽之曰諾既飲其妻曰諸大夫莫子若也然而民不能戴其上久矣難必及子子盍亟索士慙庇州犁焉得畢陽及藥弗忌之難諸大夫害伯宗將謀而殺之畢陽實送州犁於荆

左傳

十六年

晉侯使卻至獻楚捷于周與單襄公語驟稱

其伐單子語諸大夫曰溫季其亡乎位于七人之下而求掩其上怨之所聚亂之本也多怨以階亂何以在位夏書曰怨豈在明不見是圖將慎其細也今而明之其

可乎

國語晉既克楚於鄢使郤至告慶於周末將事王叔簡公飲之酒交酬好貨皆厚飲酒宴語相說也明日王叔子譽諸朝郤至見召桓公與之語召公以告單襄公曰王叔子譽溫季以為必相晉國相晉國必大得諸侯勸二三君子必先導焉可以樹今夫子見我以晉國之克也為已實謀之曰微我晉不戰矣楚有五敗晉不知乘我則強之背宋之盟一也薄德而以地賂諸侯二也棄

壯之良而用幼弱三也建立卿士而不用其言四也夷
鄭從之三陳而不整五也舉不由晉晉得其民四軍之
帥旅力方剛率伍治整諸侯與之是有五勝也有辭一
也得民二也軍帥彊禦三也行列治整四也諸侯輯睦
五也有一勝猶足用也有五勝以伐五敗而避之者非
人也不可以不戰藥范不欲我則強之戰而勝是吾力
也且夫戰也微謀吾有三伐勇而有禮反之以仁吾三
逐楚君之率勇也見其君必下而趨禮也能獲鄭伯而

赦之仁也若是而知晉國之政楚越必朝吾曰子則賢矣抑晉國之舉也不失其次吾懼政之未及子也謂我曰夫何次之有昔先大夫荀伯自下軍之佐以政趙宣子未有軍行而以政今欒伯自下軍往是三子也吾又過於四之無不及若佐新軍而升為政不亦可乎將必求之是其言也君以為奚若襄公曰人有言曰兵在其頸其卻至之謂乎君子不自稱也非以讓也惡其益人也夫人性陵上者也不可益也求益人其抑下滋甚故

聖人貴讓且諺曰獸惡其網民惡其上書曰民可近也而不可上也詩曰豈弟君子求福不回在禮敵必三讓是則聖人知民之不可加也故王天下者必先諸民然後庇焉則能長利今卻至在七人之下而欲上之是求益七人也其亦有七怨怨在小醜猶不可堪而況在侈卿乎其何以待之晉之克也天有惡於楚也故微之以晉而卻至佻天以為已力不亦難乎佻天不祥乘人不義不祥則天棄之不義則民畔之且卻至何三伐之有

夫仁禮勇皆民之為也以義死用謂之勇奉義順則謂之禮畜義豐功謂之仁姦仁為佻姦禮為羞姦勇為賊夫戰盡敵為上守蘇同順義為上故制戎以果毅制朝以序成畔戰而擅舍鄭君賊也棄毅行容羞也畔國即讎佻也有三姦以求替其上遠於得政矣以吾觀之兵在其頸不可久也雖吾王叔未能違難在大誓曰民之所欲天必從之王叔欲卻至能勿從乎卻至歸明年死難及伯輿之獄王叔陳生奔晉

○此即內傳所謂驟稱其伐也外傳復自召公

曲折述之鄙夫
驕淺其狀如見

子叔聲伯如晉謝李文子卻犢欲與

之邑弗受也歸鮑國謂之曰子何辭苦成叔之邑欲信
讓邪抑知其不可乎對曰吾聞之不厚其棟不能任重
重莫如國棟莫如德夫苦成叔家欲任兩國而無大德
其不存也亡無日矣譬之如疾余恐易焉苦成氏有三
亡少德而多寵位下而欲上政無大功而欲大祿皆怨
府也其君驕而多私勝敵而歸必立新家立新家不因
民不能去舊因民非多怨民無所始為怨三府可謂多

矣其身之不能定焉能予人邑鮑國曰我信不若子若
鮑氏有釁吾不圖矣今子圖遠以讓邑必常立矣

左傳

十七年

晉范文子反自鄆陵使其祝宗祈死曰君驕

侈而克敵是天益其疾也難將作矣愛我者唯祝我使

我速死無及於難范氏之福也六月戊辰士燮卒

國語反自

鄆范文子謂其宗祝曰君驕泰而有烈夫以德勝者猶懼失之而况驕泰乎君多私今以勝歸私必昭昭私難必作吾恐及焉凡吾宗祝為我祈死先難為免七年夏范文子卒冬難作始於三郤卒於公

國語柯陵之會單襄公見晉厲公視遠步高晉郤錡見

單子其語犯卻犢見其語迂卻至見其語伐齊國佐見其語盡魯成公見言及晉難及卻犢之譖單子曰君何患焉晉將有亂其君與三卻其當之乎魯侯曰寡人懼不免於晉今君曰將有亂敢問天道乎抑人故也對曰吾非瞽史焉知天道吾見晉君之容而聽三卻之語矣殆必禍者也夫君子目以定體足以從之是以觀其容而知其心矣目以處義足以步目今晉侯視遠而足高目不在體而足不步目其心必異矣目體不相從何以

能久夫合諸侯國之大事也於是乎觀存亡故國將無咎其君在會步言視聽必皆無謫則可以知德矣視遠日絕其義足高日棄其德言爽日反其信聽淫日離其名夫目以處義足以踐德口以庇信耳以聽名者也故不可不慎也偏喪有咎既喪則國從之晉侯爽二吾是以云夫郤氏晉之寵人也三卿而五大夫可以戒懼矣高位寔疾僨厚味寔腊毒今郤伯之語犯叔迂季伐犯則陵人迂則誣人伐則掄人有是寵也而益之以三怨

其誰能忍之雖齊國子亦將與焉立於淫亂之國而好
盡言以招人過怨之本也唯善人能受盡言齊其有乎
吾聞之國德而鄰於不修必受其福今君偏於晉而鄰
於齊齊晉有禍可以取伯無德之患何憂於晉且夫長
翟之人利而不義其利淫矣流之若何魯侯歸乃逐叔
孫僑如簡王十一年諸侯會於柯陵十二年晉殺三郤
十三年晉侯殺於翼東門葬以車一乘齊人殺國武子
左傳晉厲公侈多外嬖反自鄢陵欲盡去羣大夫而立

其左右胥童以胥克之廢也怨郤氏而嬖於厲公郤錡
奪夷陽五田五亦嬖於厲公郤犇與長魚矯爭田執而
梏之與其父母妻子同一轅既矯亦嬖於厲公欒書怨
郤至以其不從已而敗楚師也欲廢之使楚公子茂告
公曰此戰也郤至實召寡君以東師之未至也與軍帥
之不具也曰此必敗吾因奉孫周以事君公告欒書書
曰其有焉不然豈其死之不恤而受敵使乎君盍嘗使
諸周而察之郤至聘于周欒書使孫周見之公使覘之

信遂怨郤至厲公田與婦人先殺而飲酒後使大夫殺
郤至奉豕寺人孟張奪之郤至射而殺之公曰季子欺
余厲公將作難胥童曰必先三郤族大多怨去大族不
偏敵多怨有庸公曰然郤氏聞之郤錡欲攻公曰雖死
君必危郤至曰人所以立信知勇也信不叛君知不害
民勇不作亂失茲三者其誰與我死而多怨將安用之
君實有臣而殺之其謂君何我之有罪吾死後矣若殺
不辜將失其民欲安得乎待命而已受君之祿是以聚

黨有黨而爭命罪孰大焉壬午胥童夷羊五帥甲八百
將攻郤氏長魚矯請無用衆公使清沸魋助之抽戈結
袵而偽訟者三郤將謀於榭矯以戈殺駒伯苦成叔於
其位溫季曰逃威也遂趨矯及諸其車以戈殺之皆尸
諸朝胥童以甲劫藥書中行偃於朝矯曰不殺二子憂
必及君公曰一朝而尸三卿余不忍益也對曰人將忍
君臣聞亂在外為姦在內為軌御姦以德御軌以刑不
施而殺不可謂德臣偏而不討不可謂刑德刑不立姦

軌並至臣請行遂出奔狄公使辭於二子曰寡人有討於郤氏郤氏既伏其辜矣大夫無辱其復職位皆再拜稽首曰君討有罪而免臣於死君之惠也二臣雖死敢

忘君德乃皆歸公使胥童為卿

穀梁傳自禍於是起矣史記厲公多外嬖姬

歸欲盡去羣大夫而立諸姬兄弟寵姬兄曰胥童嘗與郤至有怨及藥書又怨郤至不用其計而遂敗楚乃使人閒謝楚楚來詐厲公曰鄢陵之戰實至召楚欲作亂內子周立之會與國不俱是以事不成厲公告藥書藥書曰其殆有矣願公試使人之周微考之果使郤至於周藥書又使公子周見郤至郤至不知見責也厲公驗之信然遂怨郤至欲殺之○傳言外嬖謂嬖臣非嬖姬也且妾之稱姬非當時語史記之誤多有如此者國

語既戰獲王子發鉤藥書謂王子發鉤曰子告君曰郤
至使人勸王戰及齊魯之未至也且夫戰也微郤至王
必不免吾歸子發鉤告公公告藥書藥書曰臣固聞之
郤至欲為難使苦成叔緩齊魯之師已勸君戰戰敗將
納孫周事不成故免楚王然戰而擅舍國君而受其問
不亦大臯乎目今君若使之於周必見孫周公曰諾藥
書使人謂孫周曰郤至將往必見之郤至聘於周公使
覘之見孫周是故使胥之昧與夷陽午刺郤至苦成叔
及郤錡郤錡謂郤至曰君不道於我我欲以吾宗與吾
黨夾而攻之雖死必敗國國敗君必危其可乎郤至曰
不可至聞之武人不亂知人不詐仁人不黨夫利君之
富富以聚黨利黨以危君君之殺我也後矣且衆何臯
鉤之死不若聽君之命是故皆自殺既刺三郤藥書殺
厲公乃納孫周而立之是為悼公長魚矯既殺三郤
乃脅藥中行而言於公曰不殺此二子者憂必及君公
曰一旦而尸三卿不可益也對曰臣聞之亂在內為軌

在外為姦禦軌以德禦姦以刑今治政而內亂不可謂德除鯁而避強不可謂刑德刑不立姦軌竝至臣脆弱弗能忍俟也乃薨翟二月厲公殺韓非子晉厲公之時六卿貴胥僮長魚矯諫曰大臣貴重敵主爭事外市樹黨下亂國法上以劫主而國不危者未嘗有也公曰善乃誅三卿胥僮長魚矯又諫曰夫同罪之人偏誅而不盡是懷怨而借之閒也公曰吾一朝而夷三卿子不忍盡也長魚矯對曰公不忍之彼將忍公公不聽居三月諸卿作難遂殺厲公而分其地

○韓非記事多舛云分地尤謬

公遊於匠麗氏藥

書中行偃遂執公焉召士匄士匄辭召韓厥韓厥辭曰

昔吾畜於趙氏孟姬之讒吾能違兵古人有言曰殺老

牛莫之敢尸而況君乎二三子不能事君焉用厥也

國語

藥武子中行獻子圍公於匠麗氏乃召韓獻子獻子辭
曰殺君以求威非吾所能為也威行為不仁事廢為不
知享一利亦得一惡非所務也昔者吾畜於趙氏孟姬
之讒吾能違兵人有言曰殺老牛莫之敢尸而況君乎
二三子不能事君安用厥也中行偃欲伐之藥書曰不
可其身果而辭順順無不行果無不徹犯順不祥伐果
不克夫以果戾順行民不犯也吾雖欲攻之其能乎乃止

閏月乙卯晦藥書中行

偃殺胥童民不與郤氏胥童道君為亂故皆書曰晉殺

其大夫 十八年春王正月庚申晉藥書中行偃使程

滑弒厲公葬之于翼東門之外以車一乘

殺梁傳稱國以弒其君君

惡甚矣

史記晉厲公殺其大夫三卻藥書畏及乃遂弑其君厲公更立襄公曾孫周是為悼公晉由此大夫稍彊

國語晉人殺厲公邊人以告成公在朝公曰臣殺其君誰之過也大夫莫對里革曰君之過也夫君人者其威大矣失威而至於殺其過多矣且夫君也者將牧民而正其邪者也若君縱私回而棄民事民旁有慝無由省之益邪多矣若以邪臨民陷而不振用善不肯專則不能使至於殄滅而莫之恤也將安用之桀奔南巢紂踣

於京厲汩於彘幽滅於戲皆是術也夫君也者民之川

澤也行而從之美惡皆君之由民何能為焉

已上邵氏之亡

左傳

襄公二十一年

欒桓子娶於范宣子生懷子范鞅以其亡

也怨欒氏故與欒盈為公族大夫而不相能桓子率欒

祁與其老州賔通幾亡室矣懷子患之祁懼其討也愬

諸宣子曰盈將為亂以范氏為死桓主而專政矣曰吾

父逐鞅也不怒而以寵報之又與吾同官而專之吾父

死而益富死吾父而專於國有死而已吾蔑從之矣其

謀如是懼害於主吾不敢不言范鞅為之徵懷子好施士多歸之宣子畏其多士也信之懷子為下卿宣子使城著而遂逐之秋欒盈出奔楚宣子殺箕遺黃淵嘉父司空靖邠豫董叔邠師申書羊舌虎叔羆囚伯華叔向籍偃人謂叔向曰子離於罪其為不知乎叔向曰與其死亡若何詩曰優哉游哉聊以卒歲知也樂王鮒見叔向曰吾為子請叔向弗應出不拜其人皆咎叔向叔向曰必祁大夫室老聞之曰樂王鮒言於君無不行求赦

吾子吾子不許祁大夫所不能也而曰必由之何也叔
向曰樂王鮒從君者也何能行祁大夫外舉不棄讎內
舉不失親其獨遺我乎詩曰有覺德行四國順之夫子
覺者也晉侯問叔向之罪於樂王鮒對曰不棄其親其
有焉於是祁奚老矣聞之乘驛而見宣子曰詩曰惠我
無疆子孫保之書曰聖有謩勲明徵定保夫謀而鮮過
惠訓不倦者叔向有焉社稷之固也猶將十世宥之以
勸能者今壹不免其身以棄社稷不亦惑乎繇殛而禹

興伊尹放大甲而相之卒無怨色管蔡為戮周公右王
若之何其以虎也棄社稷子為善誰敢不勉多殺何為
宣子說與之乘以言諸公而免之不見叔向而歸叔向
亦不告免焉而朝初叔向之母妒叔虎之母美而不使
其子皆諫其母其母曰深山大澤實生龍蛇彼美余懼
其生龍蛇以禍女女敝族也國多大寵不仁人間之不
亦難乎余何愛焉使往視寢生叔虎美而有勇力藥懷
子嬖之故羊舌氏之族及於難

呂氏春秋叔嚮之弟羊
舌虎善藥盈藥盈有罪

於晉晉誅羊舌虎叔嚮為之奴而股祈奚曰吾聞小人得位不爭不祥君子在憂不救不祥乃往見范宣子而說也曰聞善為國者賞不過而刑不慢賞過則懼及淫人刑慢則懼及君子與其不幸而過寧過而賞淫人毋過而刑君子故堯之刑也殛鯀於虞而用禹周之刑也戮管蔡而相周公不慢刑也宣子乃命吏出叔嚮

國語平公六年箕遺及黃淵嘉父作亂不克而死公遂逐羣賊謂陽畢曰自穆侯以至於今亂兵不輟民志無厭禍敗無已離民且速寇恐及吾身若之何陽畢對曰本根猶樹枝葉益長本根益茂是以難已也今若大其柯去其枝葉絕其本根可以少閒公曰子實圖之陽畢

曰圖在明訓明訓在威權威權在君君掄賢人之後有
常位於國者而立之亦掄逞志虧君以亂國者之後而
去之是遂威而遠權民畏其威而懷其德莫能勿從若
從則民心皆可畜畜其心而知其欲惡民孰偷生若不
偷生則莫思亂矣且夫藥氏之誣晉國也久矣藥書實
覆宗殺厲公以厚其家若滅藥氏則民威矣今吾若起
瑕原韓魏之後而賞立之則民懷矣威與懷各當其所
則國安矣君治而國安欲作亂者誰與君曰藥書立吾

先君藥盈不獲臯如何陽畢曰夫正國者不可以暱於
權行權不可以隱於私暱於權則民不道行權隱於私
則政不行政不行何以道民民之不道亦無君矣則其
為暱與隱也復產害矣且勤君身君其圖之若愛藥盈
則明逐羣賊而以國倫敦而遣之厚戒箴國以待之彼
若求逞志而報於君臯孰大焉滅之猶少彼若不敢而
遠逃乃厚其外交而勉之以報其德不亦可乎公許諾
盡逐羣賊而使祁午及陽畢適曲沃逐藥盈藥盈出奔

楚遂令於國人曰自文公以來有力於先君而子孫不
育者將授立之得之者賞

左傳藥盈過於周周西鄙掠之辭於行人曰天子陪臣
盈得罪於王之守臣將逃罪罪重於郊甸無所伏竄敢
布其死昔陪臣書能輸力於王室王施惠焉其子黶不
能保任其父之勞大君若不棄書之力亡臣猶有所逃
若棄書之力而思黶之罪臣戮餘也將歸死於尉氏不
敢還矣敢布四體唯大君命焉王曰尤而效之其又甚

馬使司徒禁掠藥氏者歸所取焉使候出諸輟輟

十二

三年晉將嫁女于吳齊侯使析歸父媵之以藩載藥盈及

其士納諸曲沃藥盈夜見胥午而告之對曰不可天之所廢誰能興之子必不免吾非愛死也知不集也盈曰雖然因子而死吾無悔矣我實不天子無咎焉許諾伏之而觴曲沃人樂作午言曰今也得藥孺子何如對曰得主而為之死猶不死也皆歎有泣者爵行又言皆曰得主何貳之有盈出徧拜之四月藥盈帥曲沃之甲因

魏獻子以晝入絳初欒盈佐魏莊子於下軍獻子私焉故因之趙氏以原屏之難怨欒氏韓趙方睦中行氏以伐秦之役怨欒氏而固與范氏和親知悼子少而聽於中行氏程鄭嬖於公唯魏氏及七輿大夫與之樂王鮒侍坐於范宣子或告曰欒氏至矣宣子懼桓子曰奉君以走固宮必無害也且欒氏多怨子為政欒氏自外子在位其利多矣既有利權又執民柄將何懼焉欒氏所得其唯魏氏乎而可強取也夫克亂在權子無懈矣公

有姻喪王鮒使宣子墨縗冒經二婦人輦以如公奉公以如固宮范鞅逆魏舒則成列既乘將逆欒氏矣趨進曰欒氏帥賊以入鞅之父與二三子在君所矣使鞅逆吾子鞅請驂乘持帶遂超乘右撫劍左援帶命驅之出僕請鞅曰之公宣子逆諸階執其手賂之以曲沃初斐豹隸也著於丹書欒氏之力臣曰督戎國人懼之斐豹謂宣子曰苟焚丹書我殺督戎宣子喜曰而殺之所不請於君焚丹書者有如日乃出豹而閉之督戎從之踰

隱而待之督戎踰入豹自後擊而殺之范氏之徒在臺
後欒氏乘公門宣子謂鞅曰矢及君屋死之鞅用劍以
帥卒欒氏退攝車從之遇欒樂曰樂免之死將訟女於
天樂射之不中又注則乘槐本而覆或以戟鉤之斷肘
而死欒魴傷欒盈奔曲沃晉人圍之 晉人克欒盈于

曲沃盡殺欒氏之族黨欒魴出奔宋書曰晉人殺欒盈

不言大夫言自外也

公羊傳曲沃者何晉之邑也其言入于晉入于曲沃何欒盈將入晉

晉人不納由乎曲沃而入也曷為不言殺其大夫非其大夫也 殺梁傳惡之弗有也 史記晉欒逞有罪奔

齊齊莊公微遣藥逞於曲沃以兵隨之齊兵上太行藥逞從曲沃中反襲入絳絳不戒平公欲自殺范獻子止公以其徒擊逞逞敗走曲沃曲沃攻逞逞死遂滅藥氏宗逞者藥書孫也其入絳與魏氏謀

國語居三年藥盈書入為賊於絳范宣子以公入於襄公之宮藥盈不克出奔曲沃遂刺藥盈滅藥氏是以沒平公之身無內亂也藥懷子之出執政使藥氏之臣勿從從藥氏者為大戮施藥氏之臣辛俞行吏執而獻之公公曰國有大令何故犯之對曰臣順之也豈敢犯之執政曰無從藥氏而從君是明令必從君也臣聞之曰

三世仕家君之再世以下主之事君以死事主以勤君之明令也自臣之祖以無大援於晉國世隸藥氏於今三世矣臣故不敢不君今執政曰不從君者為大戮臣敢忘其死而畔其君以煩司寇公說固止之不可厚賂之辭曰臣嘗陳辭矣心以守志辭以行之所以事君也若受君賜是隳其前言君問而陳辭未退而逆之何以事君君知其不可得也乃遣之

尸子范獻子游河大夫皆在君曰知藥氏之子乎大夫

莫荅舟人清涓捨楫對曰君奚問藥氏之子君曰自吾
亡藥氏也其老者未死少者壯矣清涓曰善修晉國之
政內得大夫外不失百姓雖藥氏子其若君何若不修
晉國之政內不得大夫而外失百姓則舟中之人皆藥
氏子也君曰善

已上藥氏之亡

左傳

二十六年

晉韓宣子聘于周王使請事對曰晉士起將

歸時事於宰旅無他事矣王聞之曰韓氏其昌阜於晉
乎辭不失舊

昭公

二年春晉侯使韓宣子來聘且告為

政而來見禮也觀書於大史氏見易象與魯春秋曰周禮盡在魯矣吾乃今知周公之德與周之所以王也公享之季武子賦縣之卒章韓子賦角弓季武子拜曰敢拜子之彌縫敝邑寡君有望矣武子賦節之卒章既享宴于季氏有嘉樹焉宣子譽之武子曰宿敢不封殖此樹以無忘角弓遂賦甘棠宣子曰起不堪也無以及召公宣子遂如齊納幣見子雅子雅召子旗使見宣子宣子曰非保家之主也不臣見子尾子尾見彊宣子謂之

如子旗大夫多笑之唯晏子信之曰夫子君子也君子有信其有以知之矣自齊聘于衛衛侯享之北宮文子賦淇澳宣子賦木瓜

三

年夏四月鄭伯如晉公孫段相

甚敬而卑禮無違者晉侯嘉焉授之以策曰子豐有勞於晉國余聞而弗忘賜女州田以胙乃舊勲伯石再拜稽首受策以出君子曰禮其人之急也乎伯石之汰也一為禮於晉猶荷其祿況以禮終始乎詩曰人而無禮胡不遄死其是之謂乎初州縣藥豹之邑也及藥氏亡

范宣子趙文子韓宣子皆欲之文子曰溫吾縣也二宣子曰自郤稱以別三傳矣晉之別縣不唯州誰獲治之文子病之乃舍之二子曰吾不可以正議而自與也皆舍之及文子為政趙獲曰可以取州矣文子曰退二子之言義也違義禍也余不能治余縣又焉用州其以徼禍也君子曰弗知實難知而弗從禍莫大焉有言州必死豐氏故主韓氏伯石之獲州也韓宣子為之請之為其復取之之故

七年子產為豐施歸州田於韓宣子曰

日君以夫公孫段為能任其事而賜之州田今無祿早
世不獲久享君德其子弗敢有不敢以聞於君私致諸
子宣子辭子產曰古人有言曰其父析薪其子弗克負
荷施將懼不能任其先人之祿其況能任大國之賜縱
吾子為政而可後之人若屬有疆場之言敝邑獲戾而
豐氏受其大討吾子取州是免敝邑於戾而建置豐氏
也敢以為請宣子受之以告晉侯晉侯以與宣子宣子
為初言病有之以易原縣於樂大心

年十六
三月晉韓

起聘于鄭鄭伯享之子產戒曰苟有位於朝無有不共
恪孔張後至立於客閒執政禦之適客後又禦之適縣
閒客從而笑之事畢富子諫曰夫大國之人不可不慎
也幾為之笑而不陵我我皆有禮夫猶鄙我國而無禮
何以求榮孔張失位吾子之恥也子產怒曰發命之不
衷出令之不信刑之頗類獄之放紛會朝之不敬使命
之不聽取陵於大國罷民而無功罪及而弗知僑之恥
也孔張君之昆孫子孔之後也執政之嗣也為嗣大夫

承命以使周於諸侯國人所尊諸侯所知立於朝而祀於家有祿於國有賦於軍喪祭有職受脤歸脤其祭在廟已有著位在位數世世守其業而忘其所僑焉得恥之辟邪之人而皆及執政是先王無刑罰也子寧以他規我宣子有環其一在鄭商宣子謁諸鄭伯子產弗與曰非官府之守器也寡君不知子大叔子羽謂子產曰韓子亦無幾求晉國亦未可以貳晉國韓子不可偷也若屬有讒人交鬪其閒鬼神而助之以興其凶怒悔之

何及吾子何愛於一環其以取憎於大國也盍求而與之子產曰吾非偷晉而有二心將終事之是以弗與忠信故也僑聞君子非無賄之難立而無令名之患僑聞為國非不能事大字小之難無禮以定其位之患夫大國之人令於小國而皆獲其求將何以給之一共一否為罪滋大大國之求無禮以斥之何饜之有吾且為鄙邑則失位矣若韓子奉命以使而求玉焉貪淫甚矣獨非罪乎出一玉以起二罪吾又失位韓子成貪將焉用

之且吾以玉賈罪不亦銳乎韓子買諸賈人既成賈矣
商人曰必告君大夫韓子請諸子產曰日起請夫環執
政弗義弗敢復也今買諸商人商人曰必以聞敢以為
請子產對曰昔我先君桓公與商人皆出自周庸次比
耦以艾殺此地斬之蓬蒿藜藿而共處之世有盟誓以
相信也曰爾無我叛我無强賈毋或勾奪爾有利市寶
賄我勿與知恃此質誓故能相保以至於今今吾子以
好來辱而謂敝邑强奪商人是教敝邑背盟誓也毋乃

不可乎吾子得玉而失諸侯必不為也若大國令而共
無藝鄭鄙邑也亦弗為也僑若獻玉不知所成敢私布
之韓子辭玉曰起不敏敢求玉以徼二罪敢辭之夏四
月鄭六卿餞宣子於郊宣子曰二三君子請皆賦起亦
以知鄭志子齋賦野有蔓草宣子曰孺子善哉吾有望
矣子產賦鄭之羔裘宣子曰起不堪也子大叔賦褰裳
宣子曰起在此敢勤子至於他人乎子大叔拜宣子曰
善哉子之言是不有是事其能終乎子游賦風雨子旗

賦有女同車子柳賦擇兮宣子喜曰鄭其庶乎二三君子以君命貺起賦不出鄭志皆昵燕好也二三君子數世之主也可以無懼矣宣子皆獻馬焉而賦我將子產拜使五卿皆拜曰吾子靖亂敢不拜德宣子私覲於子產以玉與馬曰子命起舍夫玉是賜我玉而免吾死也敢不藉手以拜

國語叔向見韓宣子宣子憂貧叔向賀之宣子曰吾有卿之名而無其實無以從二三子吾是以憂子賀我何

故對曰昔藥武子無一卒之田其官不備其宗器宣其德行順其憲則使越於諸侯諸侯親之戎狄懷之以正晉國行刑不疚以免於難及桓子驕泰奢侈貪欲無藝畧則行志假貸居賄宜及於難而賴武之德以沒其身及懷子改桓之行而修武之德可以免於難而離桓之臯以亡於楚夫卻昭子其富半公室其家半三軍恃其富寵以泰於國其身尸於朝其宗滅於絳不然夫八卻五大夫三卿其寵大矣一朝而滅莫之哀也唯無德也

今吾子有藥武子之貧吾以為能其德矣是以賀若不
憂德之不建而患貨之不足將弔不暇何賀之有宣子
拜稽首焉曰起也將亡賴子存之非起也敢專承之其
自桓叔以下嘉吾子之賜韓非子韓宣子曰吾馬菽粟
多矣甚懼何也寡人患之周
市對曰使駟盡粟以食雖無肥不可得也名與多與之
其實少雖無懼亦不可得也主不審其情實坐而患之
馬猶不肥也已
上韓宣子為政

左傳

二十八年

晉祁勝與鄔臧通室祁盈將執之訪於司馬

叔游叔游曰鄭書有之惡直醜正實蕃有徒無道立矣

子懼不免詩曰民之多辟無自立辟姑已若何盈曰祁氏私有討國何有焉遂執之祁勝賂荀躒荀躒為之言於晉侯晉侯執祁盈祁盈之臣曰鈞將皆死愁使吾君聞勝與臧之死也以為快乃殺之夏六月晉殺祁盈及楊食我食我祁盈之黨也而助亂故殺之遂滅祁氏羊舌氏初叔向欲娶於申公巫臣氏其母欲娶其黨叔向曰吾母多而庶鮮吾懲舅氏矣其母曰子靈之妻殺三夫一君一子而亡一國兩卿矣可無懲乎吾聞之甚美

必有甚惡是鄭穆少妃姚子之子子貉之妹也子貉早死無後而天鍾美於是將必以是大有敗也昔有仍氏生女黥黑而甚美光可以鑑名曰玄妻樂正后夔取之生伯封實有豕心貪惓無饜忿類無期謂之封豕有窮后羿滅之變是以不祀且三代之亡共子之廢皆是物也女何以為哉夫有尤物足以移人苟非德義則必有禍叔向懼不敢取平公強使取之生伯石伯石始生子容之母走謁諸姑曰長叔姒生男姑視之及堂聞其聲

而還曰是豺狼之聲也狼子野心非是莫喪羊舌氏矣

遂弗視

國語楊食我生叔向之母聞之往及堂聞其號也乃還曰其聲豺狼之聲也終滅羊舌氏之宗

者必是子也

列女傳晉羊叔姬者羊舌子之妻叔向

叔魚之母也

羊舌子好正不容於晉去之三室之邑

人相與攘羊而遺之不受叔姬曰夫子居晉不容去之又不容於三室之邑不如受之羊舌子受之曰為盼與

鮒烹之叔姬曰不可南方有鳥名曰乾吉食其子不擇肉子常不遂今盼與鮒童子也隨大夫而化者不可食

以不義之肉不若埋之以明不與後二年攘羊之事發都吏至羊舌子曰吾受之不敢食也發而視之則其骨

存焉都吏曰君子哉羊舌子不與攘羊之事矣叔向欲娶於申公巫臣氏夏姬之女叔姬不欲平公強使娶之

生楊食我號曰伯碩生時侍者謁之叔姬往視之及堂聞其號也而還曰豺狼之聲也狼子野心滅羊舌氏者

必是子也及長與祁勝為亂晉人殺食我羊舌氏由是遂滅

秋晉韓宣子卒魏獻

子為政分祁氏之田以為七縣分羊舌氏之田以為三縣司馬彌牟為鄔大夫賈辛為祁大夫司馬烏為平陵大夫魏戊為梗陽大夫知徐吾為塗水大夫韓固為馬首大夫孟丙為孟大夫樂霄為銅鞮大夫趙朝為平陽大夫僚安為楊氏大夫謂賈辛司馬烏為有力於王室故舉之謂知徐吾趙朝韓固魏戊餘子之不失職能守業者也其四人者皆受縣而後見於魏子以賢舉也魏

子謂成鱣吾與戊也縣人其以我為黨乎對曰何也戊之為人也遠不忘君近不偪同居利思義在約思純有守心而無淫行雖與之縣不亦可乎昔武王克商光有天下其兄弟之國者十有五人姬姓之國者四十人皆舉親也夫舉無他唯善所在親疏一也詩曰唯此文王帝度其心莫其德音其德克明克明克類克長克君王此大國克順克比比于文王其德靡悔既受帝祉施于孫子心能制義曰度德正應和曰莫照臨四方曰明勤

施無私曰類教誨不倦曰長賞慶刑威曰君慈和徧服
曰順擇善而從之曰比經緯天地曰文九德不愆作事
無悔故襲天祿子孫賴之主之舉也近文德矣所及其
遠哉賈辛將適其縣見於魏子魏子曰辛來昔叔向適
鄭駸蔑惡欲觀叔向從使之收器者而往立於堂下一
言而善叔向將飲酒聞之曰必駸明也下執其手以上
曰昔賈大夫惡娶妻而美三年不言不笑御以如臯射
雉獲之其妻始笑而言賈大夫曰才之不可以已我不

能射女遂不言不笑夫今子少不賜子若無言吾幾失子矣言之不可以已也如是遂如故知今女有力於王室吾是以舉女行乎敬之哉毋墮乃力仲尼聞魏子之舉也以為義曰近不失親遠不失舉可謂義矣又聞其命賈辛也以為忠詩曰永言配命自求多福忠也魏子之舉也義其命也忠其長有後於晉國乎冬梗陽人有獄魏戊不能斷以獄上其大宗賂以女樂魏子將受之魏戊謂閭沒女寬曰主以不賄聞於諸侯若受梗陽人

賄莫甚焉吾子必諫皆許諾退朝待於庭饋入召之比
置三歎既食使坐魏子曰吾聞諸伯叔諺曰唯食忘憂
吾子置食之間三歎何也同辭而對曰或賜二小人酒
不夕食饋之始至恐其不足是以歎中置自咎曰豈將
軍食之而有不足是以再歎及饋之畢願以小人之腹
為君子之心屬厭而已獻子辭梗陽人國語梗陽人有
獄將不勝請納
賂於魏獻子獻子將許之閻沒謂叔寬曰與子諫乎吾
主以不賄聞於諸侯今以梗陽之賄殃之不可二人朝
而不退獻子將食問誰在庭曰閻明叔褒在召之使佐
食比已食三歎既飽獻子問焉曰人有言曰唯食可以

忘憂吾子一食之閒而三歎何也同辭對曰吾小人也
食饋之始至懼其不足故歎中食而自咎也曰豈主之
食而有不足是以再歎主之既食願以小人之腹為君
子之心屬厭而已是以三歎獻子曰善乃辭梗陽人

史記晉之宗家祁奚孫叔嚮子相惡於君六卿欲弱公
室乃遂以法盡滅其族而分其邑為十縣各令其子為

大夫晉益弱六卿皆大

已上祁氏羊
舌氏之亡

繹史卷八十七上